



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tir\_yimyim

yt tir yimyim

TAPAK 7

## Kejriwal dang nungibo Atishi tajungba

## Alimai Russia nem telangzuba agütsütsüla

VOL. XXII ISSUE NO. 45 (ADOK 45)

DIMAPUR

KÜPTOKNÜ (SATURDAY)

YIMPOKSÜI (NOVEMBER) 23, 2024

₹ 5.00

## World War 3 tenzükogo: Valery Zaluzhny

New Delhi, November 22, 2024 (Agencies): World War III tenzükogo kechiyong Russia den yaritepertemi indangindanga shilem agir ta Ukraine nung taoba Commander-in-Chief Valery Zaluzhny-i ashi.

"2014 nung Third World War tenzükogo ta ni amanger" ta Zaluzhny-i ashi. Pa ya yang Ukraine's envoy to the United Kingdom inyaker.

"North Korea nungi sepaitemi Ukraine jakdang noktaka lir. Ukraine nung Iranian 'Shahedis' ajanga civilians tepseter. North Korea sepaitem aser China

prangpong-injangtem ajanga iba rara nung shilem agir" ta pai ashi.

Ukraine den yaritepertemi lemtet tajung agitsüla aser linük arrtsü adena rara meyoxtsü atema noktangtsüla. Iba rara yangi (Ukraine) dang tembangtsü takoktsü lir saka onok den yaritepertemi iba ya mangateter. Ukraine anema tsükchir aika lir" ta Zaluzhny-i ashi.

Russia-i North Korea sepai 10,000 tema Kursk region-i yokba aser Iranian drones aser tanga advanced weaponry amshiba atema pai iba ya metetdaksü.

## 17 buba Unification Anniversary among

Dimapur, November 22, 2024 (TYO): GPRN/NSCN (Unification)-i Council headquarters, Naga Unification camp, Khehoyi nung 17 buba Naga Unification sentong ayonga mongogo.

"Kija aser nija tebilembatem ajanga Naga movement tejakleni moutettsü anungji chichiba unity movement ka nungdakba agi November 22, 2007 nü NSCN (U) kümtet. Telok tasen aika razüka tentetba ta ajak asoshi tebilemtsü saka shibai Naga linük atema inyaker aser shibai Naga movement tenüng amer pei ajangzüksü atema inyaker jangjatsüla" ta GPRN/NSCN (U), Ato Kilonser Alezo Venuh-i ashi.

"National worker shiai iba jenjang angatetsüla aser ki tululu yanglutsü aser asenok yaritem amokmerentsüba masü saka linük tenzüksü nangzüksütsüla. Iba tangatetba nung manidakra nisungtemi pei asoshi dang bilemba lennirtem atsüngdoktsü" ta Alezo Venuh-i ashi.

Working Committee, Naga National Political Groups (WC, NNPGs) nung NSCN (U)-i tongtipang shilem agiogo. Onoki India sorkar den yimtenren olemtep liasü aser takok ngua tembangogo. Arogo, FNR aser kin hoho tongitemi Naga nung longjemtsü aser putepshitsü atema inyaka aruba nung NSCN (U)-i shilem tajung agia aruogo, ta paisa ashi.

India sorkari Agreed Position nung lateta aliba ama High Power empowered committee ka tentettsü mulungogo aser parnoki alemli nungi Naga tesemtem arrtsü ladangtsü. Tanü Naga Areas ka kuma lokteptsüba mapa

tenzükogo ta Alezo-isa ashi.

Tanü Naga nung shisatsü lemsateptsüla aser shisadangtsüla. Yimtenren mapa tajung ka ajanga asen putiotsü aser yimten temetentem meyiya angutsüla ta paisa shisem.

NSCN(U)-i Naga nung teimla atongtsüsa inyaksü, Naga aser Non-Naga nung külemi teputep nung liyonga aotsü atema inyaksü ta paisa metetdaksü.

November 17, 2017 nü Agreed Position nung "Parnok tarutsü asoshi asadanga inyaka aotsü atema Naga nung putiotsü aser yimtenren temetentem India sorkari agizüker" ta shia lir ta Alezo-isa metetdaksü.

"India sorkar aser NSCN IM tsüngda olemtep aser Framework Agreement ya tangar dang mesayuba kulikaket mesüra jungjunga mebendenba kulikaket ka ama lir. 1997 nungi 2015 tashi olemtepa aruba ajanga Naga yimten tebilemtsü atema temeten kecha bener maru aser Framework Agreement nung tapak ka dak alaka ajak miimbanga dang ayu. Iba nung ajemdaker NNPGs-i kanga dang kümdanga India sorkar noktaka onük shia den tokteptsü atema lenmangtem bushitep" ta paisa ashi.

Iba sentong nung GPRN/NSCN (U) president Gen. (Retd) M.B Neokpao Konyak-i Naga national flag salatsü aser Nagaland Tribes Council, Forum for Naga Reconciliation, NNPGs Working Committee, Nagaland Gaon Bora Federation, Naga Students Federation, Eastern Naga People's Organisation o Naga Council Dimapur ajanga o tatsütsü jembii.

## Kohima nung NH anasa RoW merüktet

Dimapur, November 22, 2024 (TYO): Kohima Deputy Commissioner-i tuyuba nung ajemdaker National Highway nung Right of Way (RoW) nung aliba garitem aser ali atsünga agia alibatem agienogo.

National Highway nung gari anena ayuba, ki yangludang amshiba osettem aser jana

bendenba ajanga traffic timtem agütsür aser public atema lendong bentsür arutsüsa akümba ajanga iba mapa ya inyak.

Kohima nung ward ajak nung lokti nübodoka merükmejuba mapang iba mapa ya inyak. Iba sentong nung sorkar mapa inyakertem, Kohima Municipal Council, NGOs aser public-i shilem agi.

## Manipur-i central forces talila 10,000 yokker

Imphal/New Delhi, November 22, 2024 (Agencies): Centre sorkari Manipur-i sepai talila 10,000 yoktsü aser parnok züngsema company 288 akümtsü ta Manipur Chief Security Adviser-i ashi.

Central forces company 90 (sepai 10,800 shi) yokba züngsema Manipur nung company 288 mapa lemezüksüogo, ta Security Adviser Kuldiep Singh-i ashi.

May 2023 nung Manipur nung mepetmesü adokba sülen nisung 258 süogo ta pai ashi. ?

"Central forces company 90 arudar. Parnok aika Imphal tongogo. Onoki nisung taküm aser kiojentem kümzüka ayutsü aser lendong ataloktsü ana nung aliba tesemtem kümzüka ayutsü atema sepaitem mapa lemezüksür" ta Kuldiep-i ashi.

"Anogo ishika tsüngda tesem ajunga ayimjemtsü. Onoki maparen renemogo. District shia nung coordination cells aser joint

control rooms tasentem amenoktsü, tang lapoka alibatem onoki meyipa reprangshio" ta paisa metetdaksü.

May 2023 nung Meitei aser Kuki kintem tsüngda rara adokba sülen police armouries nungi auyazüka bener aoba prangpong 3,000 shi onoki ngutetogo ta Kuldiep-i ashi.

Manipur police, Central Reserve Police Force (CRPF), Border Security Force (BSF), army, Assam Rifles, Indo-Tibetan Border Police (ITBP), aser Sashastra Seema Bal külemi maparen inyaka arur.

"Onoki Manipur tebilemtsü koktetsü atema külemi inyaker. Khuret kechi arudir onoki külemi inyaker. Operations maneni inyakdar aser standard operating procedure (SOP) tasen ka tenzüksü" ta pai metetdaksü.

November 7 nü Jiribam kübok Zairawn yimtsüng nung Meitei telungpurtemi Hmar kin nungi tanur asem tetsü ka tepsetba

sülen tensa tamajungba aküm. Iba tayang küpzüka November 11 nü Kuki telungpurtemi Jiribam kübok Borobekra amak.

Iba mapang CRPF den khatepdang Kuki telungpur 10 khaset aser parnoki Meitei nung kibong ka nungi nisung 6 pur ao. CRPF den mekhatepdang Kuki telungpurtemi Meitei nung tambur ana khaseta liasü.

Nisung kari democratic movement tenüng amer minister aser MLA tem ki kakkoka tur auya aser rongdoktsü. CCTV ajanga temulung melemi bilemertem jangjaogo aser ozüngren mapa tenzükogo. Manipur nung ibala mapa inyaker ta ni yimjak nung aakseta ashir, ta Kuldiep Singh-i ashi.

"CRPF-i Jiribam nung telungpur 10 mekhaset asübo November 11 nü civilians 100 shi tepseter lila. Telungpurtemi Borobekra nung relief camp ka aser police station ka amaktsü sentong liasü" ta paisa ashi.

## Guwahati nung Nagaland nungi tetsür ka pur ao

Guwahati, November 22, 2024 (Agencies): November 21, 2024 aonung Guwahati kübok Paltan Bazar nung nisung anati tetsür ka pur ao.

Tetsür la ya mashisa lir aser la kinungbo den külemi liasü aser pa khu tabeni orr alidang nisung anati la pur ao.

Yasüng ayaterm 12:00 ako meta Paltan Bazar police station jakdang iba lendong atalok.

Tetsür la kinungboi ashiba agi tena West Bengal kübok Alipurduar nungi Dimapur, Nagaland nung kidangi meyipa aoerba liasü.

Tena train melenteptsü asüba agi Guwahati nung anenzük aser railway station anasa Paltan Bazar nung aliba roadside restaurants nung tena chiyungi ao. Pai kinungtsü idakji yutsür tena khu abeni ao aser pa malidang

motorbike nung nisung ana arur la pur ao.

Pa kinungtsü ya ita ka mashisa lir ta kinungboi ashi. Iba dak sendakba nung Paltan Bazar police station nung ken o ka benok saka police-i temulung magütsür ta kinungboi ashi

Police station nung enoka aliba CCTV cameras ajanga iba tatalokba tangoka alitsü saka police-i reprangtsü nungnanger ta paisa ashi.

## Bendang Walling-i Ustad Bismillah Khan Yuva Puraskar angu



Dimapur, November 22, 2024 (TYO): Hill Theatre founder aser nungtugu director Bendang Walling nem 2023 atema Ustad Bismillah Khan Yuva Puraskar agütsüogo.

Linük nung nisung 39 rongnung Bendang Walling dena iba sempet angu. Nagaland nung direction wadang nung pai mezüngbuba iba sempet nguogo.

Iba sempet ya Sangeet Natak Akademi, New Delhi (National Academy of Music, Dance and

Drama, an Autonomous Body of the Ministry of Culture, Government of India) ajanga agütsür.

Iba sempet ya 2006 küm nungi tenzükaga agütsür aser music, dance, drama, folk and tribal arts, & puppetry nung arishi küm 40 teküpokpur artist nem agüja arur.

Bendang-i Direction wadang nung iba sempet angu. Pa ya artist aser performer ka lir.

"Iba sempet ya kü atema

konang ka dang masü saka külem Naga nung dang art wadang atema lenmangtem lir ta osang sangoktsür. Nisung kati theatrical aser performing arts nung shilem agitetsü aser iba ajanga loktiliba nung temelenshi bener arutetsü" ta Bendang-i ashi.

Bendang Walling ya National School of Drama, New Delhi nung azünger ka lir. Pa ya Hill Theatre Nagaland Founder lir aser tesüiba küm 20 tsüngda theatre plays aser films aika direct süogo.



## Hornbill Music Festival 2024 nung ESTAMPAS DEL PERU-i shilem agitsü



**Kohima, Yimpoksüi/Nov. 22 (TYO):** 25th Hornbill Music Festival 2024 mapang December 2, 2024 nikongdang 5:00 ako nungi tenzuka Naga Heritage Village Kisama nung ESTAMPAS DEL PERU ajanga shilem agitsü.

Cultural Association "ESTAMPAS DEL PERU" ya küm 25 dak tema bendang lima nung Peruvian sobaliba prokshia nūburtem dangi akhi Peruvian ken aser tsüingsang bener arua sayur.

Iba Association ya Ricardo

Delgado lenisüba kübok lir, shiba Arequipa, Peru nung asoba nūngtugu artist ka lir.

Ricardo ya kentener, kaket zülur, ken mejemer aser instrumentalist ka lir. Pa Arequipa nung aliba National University of San Agustin (UNSA) nung music azüng aser lanuwa nungi Latin American music groups balala nung flute player ka ama liasü.

1990s mapang pai Europe linüktem sema jaja aser Conservatories of Bois-Colombes and Levallois-Perret,

France nung ano zünglok aser kasa mapang Europe tesem ajungalen concerts ayongzuka Peruvian music sayua liasü.

Pai Peruvian sobaliba temaba jenjangi ajungketsü mechi bendanga agütsür inyakba ajanga Arequipa nung Diploma aser Medal of Honor angu aser bendang lima nung Peruvian music indang ambassador ama züngshia liasü.

Ricardo Delgado ya tangbo Paris, France nung alir aser yangjia pai maneni cultural advocacy mapa inyaker.

## Deputy Commissioner Dimapur ajanga pelaba lemsatep

**Dimapur, Yimpoksüi/Nov. 22 (TYO):** Benjong mapang tonga arudang terenemshiba ka ama November 22, 2024 nü Dimapur district nung lokti nūbuttsük ayongzükba nung shilem agir ajunga dang Deputy Commissioner, Dimapur, Dr. Tinojongshi Chang-i pelaba lemsatep liasü.

Iba sentong nung Dimapur Municipal Council (DMC), EDTC, Naga Council Dimapur, Naga Women Hoho Dimapur,

G.Bs, wards aser colony balala nungi chariman tem densema department balala nungi shilem agia liasü.

Lokti tentet balala aser nūburtemi shilem tajung agiba ajanga iba sentong takok ngua agitetogo, ta DC Dimapur ajanga ashi aser nūburtemi amshiba tesemtem müreka ayutsü tongtipang lir ta ashi aser dokan kibur aser nūburtem dang pei aliba tesem aser temeket müreka ayutsü ayongzük.

DC Dimapur Dr. Tinojongshi Chang-isa restaurants aser chiyongtsü ayokertem dang müremkejua alitsü ajungshia liasü.

Benjong asoshi iba lokti nūbuttsük mapa ya tanen makai inyaktsü aser ibaji ajanga Dimapur district nung alirtem talu lungjemtsü aser nūburtem aser lokti tentet balala lungjemer maneni inyakba ajanga Dimapur müreka alitsü imlar, ta pai ashi.

## Phek, Zunheboto aser Mokokchung nung NVBDCP senden amen

**Dimapur, Yimpoksüi/Nov. 22 (TYO):** National Vector Borne Diseases Control Programme (NVBDCP) ajanga Phek, Zunheboto aser Mokokchung nungi district team tem den pei district headquarters nung November 18-20, 2024 anogotem senden mena liasü.

Item senden indang nükjidong ya ground-level workers temi inyakba repringshitsü aser terenlok nūngdakba jangjatetsü asoshi liasü.

Item senden nung jembidang Dr. Neisakho Kere, Joint Director and State Programme Officer, NVBDCP ajanga Nagaland nung ramen samadaksütsü nūngdakba indang jembi.

2030 tashinung linük tesem ajunga nung ramen samadaksütsü India indang nükjidong aliba nung shilem ka ama National Centre for Vector Borne Diseases Control Programme (NCVBDC) ajanga state ajunga dang 2027 tashinung ramen samadaksütsü

totuyuba agüja lir, ta pai ashi.

Ramen samadaksüba ya takok tulu asütsü aser nisung takum jenti kumzüktsü, ta Dr. Kere-i ashi. 2009 küm Nagaland nung ramen agi meneper nisung 8,984 liasü aser nisung 35 asü. Ajisüaka ketdangsür temi meranga inyakba ajanga cases kanga ajema kumogo aser taoba küm nisung pezü dak dang iba tashidak puteta liasü, ta pai ashi.

Taküm district tenet nung ramen putetba meliasü, saka Phek, Mokokchung, Peren aser Zunheboto nungbo iba tashidak puteta liasü, ta ashi.

Indigenour malaria cases kanga ajema kumogo, saka imported cases tali akumba indang tebilemstü pai lemsatep aser ano jateta adoktsü anameta nung lir, ta ashi.

Pai item district nung surveillance efforts tashi itshitsü aser documentation shidak bendentsü pai ayongzük.

Tzüingsang mopung melenshiba aser alima talemba akumba ajanga vector-borne

diseases nung kongshir, ta Dr. Kere-i ashi.

Ramen tashidak ajema akumer, saka dengue aser Japanese encephalitis amala tashidak timba akumer, anungji field health workers tem saksalema alitsü aser jila nunga süshia yimadak-timtsüngtem nunga süshia vector-borne diseases tem puteta anepalutsüla, ta pai ayongzük.

Deputy Director, NVBDCP, Dr. Tinurenla Anichari-ia district staff tem dang tali bendanga agütsür inyaktsü ayongzük. Lai Accredited Social Health Activists (ASHAs) tem ajungmeso aser kiboksem oa fever screenings agiba mapang amalitep akatsü ayongzuka liasü.

Item senden nungya DVBOs (District Vector Borne Disease Officers), DVBCs (District Vector Borne Disease Consultants), Surveillance Workers (SW), Malaria Technical Supervisors (MTS), Statistical Investigators (SI) aser Malaria Inspectors (MI) dena liasü.

## Chief Secretary-i Kisama semdang

**Dimapur, Yimpoksüi/Nov. 22 (TYO):** Nagaland Chief Secretary, Dr. J. Alam, IAS ajanga November 22, 2024 nü Naga Heritage Village, Kisama semdanga yangji tang teinyakdak kisü-jensü mapa repringa liasü. Iba mapang pai kisü-jensüba

tesem ajak repringa parking area semdanga liasü. Chief Secretary ajanga contractor aser department balala nungi ketdangsür den sensaksema mapang shidak nung project tem renemtsü nūngdakba lemsatep liasü.

## DoSE kübok inyaker registration atema metetdaksür

**Dimapur, Yimpoksüi/Nov. 22 (TYO):** School ketdangsüba aser system tajungba kumdaksütsü nükjidong nung Directorate of School Education (DoSE) kübok Nagaland Education Project - The Lighthouse (NECTAR) ajanga state kübok tesem balala nung May nungi tenzuka August 2023 tashi Teachers Attendance Monitoring System (TAMS) asoshi employee verification and authentication drive inyaka aru aser absentees atema October 19-26, 2023 anogotem follow-up drive agia liasü, ta Directorate of School Education sangdong ka ajanga ashi.

Ajisüaka employees karbo tang tashi verification aser authentication exercise ya ano magi lir. Anungji October 2023 sülen shimba employees tem densema DoSE kübok mapa inyaker shirnoksa authentication process meinyaki ali, nenok ajak November 25-28, 2024 anogotem office mapang Directorate of School Education, Bayavu, Kohima nung nūngdakba documents bener arua report agütsütsü metetdaksür, ta sangdong ajanga ashi.

Maneni UGHT/GHTs

shirnoksa taoba mapang email ajanga documents agüja verified sür ali, parnoka master selfie agitsü atema Directorate tonga arutsü metetdaksür, ta ashi.

Sanctioned medical/earned leaves mechi verification drive nung madener tema authentication atema arutsü metetdaksür, ta ashi.

Employee Data Verification and Authentication Form ya www.nagalandeduproject.com nungi download sütetsü mesüra pei school heads ket nungia meshitsü akok, aser ibaji shidal fill up sür head of school, EBRC Co-ordinator, DEO/SDEO ajanga jangjar Area Administrative Officer ajanga countersign agütsür authentication atema Aadhar Card, Samagra Shiksha ajanga agütsüba ID Card, Appointment Letter, Transfer/Posting Order, Regularization Order, Extension Order tasenba, bio-data tejangja aliba Service book tapak (original aser photocopy) den bener arutsüla, ta metetdaksü.

Authentication atema register masüba employees nem temerenshi agütsütsü, ta sangdong ajangasa ashi.

## Chief Secretary-i anir lokti nūbuttsük takok ngua liogo

**Dimapur, Yimpoksüi/Nov. 22 (TYO):** Benjong mapang tonga arudang terenemshiba ka ama November 22, 2024 nü Kohima aser Nagaland tesem balala nung lokti nūbuttsük ayongzuka liasü.

State tesem ajunga nung lenmang, kilentzü aoba tesem, sorkar indang office aser temeket müreksü nükjidong nung iba sentong ya ayongzuka liasü.

Kohima nung mürekmejuba sentong nung Chief Secretary Nagaland, Dr. J Alam, IAS-i anir Heads of Departments, sorkar ketdangsür aser staff tem densema lokti balala nungi shilem agia liasü.

Dr. J Alam, IAS-ia shilem tajung agia Nagaland Civil Secretariat indang ketdangsür aser staff temi Sanuoru Bridge nungi Directorate of IT&C tashi müreka jaja.

Pai state yimtiba nung tesem balala semdanga liasü, kong All Nagaland Taxi Association Kohima aser Lhisemia Youth Organisation den kiyong balala nung alirtemi mürekmeju mapa inyaka liasü.

Nūburtemi amshiba tesemtem, metzü meshiba, gari

anena ayuba, tetsüng lenmang aser office tem tebour junga inyakba den dokan aser business establishment tem whitewash süa liasü.

Zunheboto district nunga kasa anogo district headquarters aser subdivision tem nung sorkar ketdangsür, nija institutions, ZTC, business establishments, colony aser nūburtemi mürekmeju mapa inyaka liasü.

Chümoukedima district nunga lokti nūbuttsük mapa ya November 22, 2024 anepdang 9:00 ako nungi tenzuka Dimapur nungi Kohima leni atuba National Highway – 1st Gate, Chate Bridge, Unity Gate, Patkai College Junction aser Old Chate River Steel Bridge tem müreka liasü.

Iba mapa nung Deputy Commissioner, ADC aser Chümoukedima district kübok sorkar meyong office balala nungi shilem agia liasü.

Kasaji Peren, Tuensang, Niuland, Wokha, Mon aser Medziphema nunga sorkar ketdangsür temi anir nūburtemi iba lokti nūbuttsük sentong nung shilem agia liasü.



### Kejriwal dang nungibo Atishi tajungba: Delhi Lt Governor VK Saxena



November 22, 2024 nü New Delhi nung Indira Gandhi Delhi Technical University for Women (IGDTUW) 7buba Convocation nung Delhi Chief Minister, Atishi. Delhi Lt. Governor Vinai Kumar Saxena aser tangartem adenba noksa nung angur.

**New Delhi, November 22 (Agencies):** AAP lenir aser Delhi Chief Minister Atishi tenüng sanga Hokolbarnü Delhi Lieutenant Governor, VK Saxena-i taoba Chief Minister Arvind Kejriwal dang nungibo Atishi meyrjang ben agi tajungba, ta ashi.

New Delhi nung Indira Gandhi Delhi Technical University for Women 7buba

Convocation sentong nung jembidang Saxena-i, "Tanübo Delhi Chief Minister ya tetsür ka asübayong ni pelar. La ya la jakdang inyaksang (Kejriwal) dang nungibo meyrjang ben agi tajungba, ta ni shiteter," ta metetdaksü.

Kasa sentong nungji Atishi-a liasü.

Taküm September ita nung Arvind Kejriwal-i Chief Minister menden tokja liasü.

September 13 nü Kejriwal Tihar Jail nungi chiok. Delhi excise policy ken o dak sendakba nung pa ita pongu tashi jail nung liasü.

Pai CM menden toktsüba sülen legislature party senden nung chief minister menden atema pai Atishi tenüng benoka liasü aser ajaki ibaji melunga agizük.

Iba sülen September 21 nü lai CM tenangzükba agia liasü.

### Chhattisgarh nung Maoists telungpur 10 khaset

**Raipur, November 22 (Agencies):** Hokolbarnü Chhattisgarh state kübok Sukma district nung security sepaitemi Maoists telungpur 10 khasetogo, ta police ketdangser kati metetdaksü.

Inspector General of Police (Bastar Range), Sundarraj P-i, Bhejji police station jurisdiction kübok arem ka nung sepaitem aser telungpurtem tsüngda rara tenzuka liasü, ta metetdaksü.

Korajguda, Dantespuram, Nagaram aser Bhandarpadar yimtsüngtem kübok arem nung Konta aser Kistaram area committees nungi züngsemtem

lir, ta osang metetba sülen security sepaitemi Maoists telungpurtemji mita ao, ta paisa metetdaksü.

Raraba tesem nungjagi tang tashi nung telungpur tasü mang ter nguogo, iba denji külemi telungpurtem indang INSAS rifle ka, AK-47 rifle ka aser Self-Loading Rifle (SLR) ka nguogo, ta pai metetdaksü.

District Reserve Guard (DRG) aser Central Reserve Police Force (CRPF) sepaitemi maneni iba tesem nungji telungpurtem ita odar, ta paisa shisem.

Chhattisgarh Chief Minister Vishnu Deo Sai-i security

sepaitem nem tenüngsang agütsüba den külemi pai aniba sorkari Bastar region nung sensotem kümzuka alitsü, yimjung alitsü aser terenlok alitsü atema inyaksü, ta metetdaksü.

"Tanep Sukma district nung security sepaitemi Maoists ter khasetogo. State sorkari Maoists inyakyim magizükteti parnok anema inyaker. Bastar nung terenlok, yimjung aser sensotem kümzuka alitsüji state sorkar atema tongtibangtiba. Bastar nung yimjung, terenlok aser azükaru putu tenzükogo," ta metetdaksü.

### Adani anema bushisüngdangtsü atema JPC tentettsü akhanger

**New Delhi, Yimpoksüi/ November 22 (Agencies):** Asükwa mongpu Parliament senden November 25 nü tenzüksü lia US agencies-i Gautam Adani-i sübokrem amshi, ta pa nem tai tongloktsüba sülen opposition-i iba ya bushisüngdangtsü atema Joint Parliamentary Committee (JPC) tentettsü akhanger.

Brihostibarnü Lok Sabha nung opposition lenir, Rahul Gandhi-i Adani anema bushisüngdangtsü atema JPC ka tentettsü takhangba agütsü. BJP otongdar, Sambit Patra-

i, "Asükwa mongpu Parliament tenzükba mapang nung Lok Sabha nung opposition leniri drama ka tenzüksü aser senden nung timtem agütsüba den külemi rongsenkettzüng anema jembitsü," ta ashi.

Tan mongpu Parliament nung sorkari 'one nation, one election' atema constitutional amendment bill ka benoktsü aser Waqf (Amendment) Bill benoktsü tebilemba lir.

Iba dak alia opposition-i Adani anema bushisüngdangtsü takhangba agütsüba ajanga senden nung aiben rongrong adoktsüa akok.



November 22, 2024 nü Georgetown, Guyana nung Ato kilonser Narendra Modi den tangartemi Indian Arrival Monument semdangba mapang tangokba noksa nung angur.

### Tanü Jharkhand nung assembly elections osang sangdongtsü

**New Delhi, November 22 (Agencies):** Jharkhand nung legislative assembly election shilem ana lemsar November 13 aser November 20, 2024 anogotem nung agiogo aser November 23 nü vote zünga osang sangdongtsü.

Election Commission-i, Honibarnep 8:00 ako nungi vote azüngtsü, ta metetdaksüogo. Iba election nung ruling Jharkhand Mukti Morcha (JMM)-i opposition INDIA teloktep nung aliba party tem den longjemer toktep.

BJP-i aniba National Democratic Alliance (NDA) teloktep nung All Jharkhand Students Union (AJSU), Janata Dal (United) aser tanga party tem longjemer toktepa liasü.

Election tembangba sülen exit polls tenet nungi pezüibo NDA-i takok angütsü ta

sangdong, exit poll ka ajanga NDA aser opposition teloktepi atongtepa takok angütsü ta asadangtet aser exit poll ana ajangabo opposition INDIA teloktepi takok angütsü, ta sangdongogo.

Jharkhand Assembly elections mezüngbuba shilem nung constituency 43 nung election agi aser voters shilem 67-i vote agütsü. November 20 nü election shilem tanabuba nung constituency 38 nung voters shilem 68.45-i vote agüja liasü.

Election shilem tanabuba nungbo constituency shilem 85 nung voters ji teburtem dang nungibo tetsürtem teimba liasü.

Election Commission of India-i parnok indang official website <https://results.eci.gov.in/> aser Voter Helpline App ajanga vote azüngba osang live agütsütsü.

### Tzüyim nung Navy submarine ka aser angopur rong ka na tsüktep

**New Delhi, November 22 (Agencies):** Goa tzüyimkü nungi pilar tzüyim nung Indian Navy indang submarine rong ka aser angopurtem rong 'Marthoma' na tsüktepba sülen nisung 11 bo kümzükogo saka tang tashi nisung anabo mangur. Goa nungi nautical mile 70

shi pilar rong anaji tsüktepa liasü. Submarine aser angopurtem rong na tsüktepba sülen Navy-i Search and Rescue (SAR) operation tenzuka liasü. Rong trok aser tayimtsü kar amshia angopurtem rongji bushia nisung 11 kümzük. (Maneni tapak 8 nung...)



November 22, 2024 nü Delhi nung AAP tongti lenir, Arvind Kejriwal den party lenirtem-Manish Sisodia, Sanjay Singh, Gopal Rai, Raghav Chadha aser Satyendar Jain nungeri Delhi Assembly election atema 'Revdi Par Charcha' campaign tenzüksü dang tangokba noksa nung angur.





# TIR YIMYIM

YIMOBILEM (EDITORIAL)

DIMAPUR

KÜPTOKNÜ

YIMPOKSÜI 23, 2024

## Mojing dangbo marütsütsüla !

**A**tangji mojing mapaji ajak tamajung saka asenok dak atalokba tamajung ajakbo mojingi inyakba mapa masütsüa akok, anungji asenok taküm nung tensa tamajung aser timtem tuoshi ajurudang, itemji mojing mapa asü mesüra asen mekümdangba ajanga atalokar asenoki metettsü aser jangjatsübaji kanga tongtibang lir. Ibaji aiben asenoki mejangjatetba agi asenoksasa asenok timatemer aser lendongi aier. Akhi alemli mapang, tanü ama temang shirangdaksüba tashidak aser mozü indang memetetba mapang, alu lenmang nung temang nung blood pressure meshidak kümer mangmanga laora, aji mopong tamajung agi asem ta jemb. Tsürabur oshi nung mopong tamajungji temenen mojing liasü, anungji blood pressure high mesüra low agi timtemdaksübaji mojing dang atong. Kasaji, tanü asenok aika dak mashimalu jakla keta lir aser asenok ya meteter amai saka maparen aika nung mashimemetet agi asenok akoksar. Aji oda, azü agi angoba junga mereprangi toktsüba ajanga azüra aita yiamata shiranger dena asenoki ibaji temenen tanelai apua ta bilemer aser menur asüyonga mozü ki bushitsü melen Sarasademba ki "Prayer Home" bushia bener aoer. Idakji mojing arüja saraasadema anepalur aser lumia lumidaksür. Iba amaji anogo ishika mojingasa arüja amongdang shirangerji tamajungba kümdaksür tesüsa mozü ki bushir aser taküm tatem akümer. Kasaji, asenok temang nung temesen aser tezüng kanga mejungi akümdanga yiamata shiranger, anungji ajia asenok aikati mojingi apua ta bilemer. Ashiko, karibo tangar tenük meremertemi 'jaadu' agi yiadaksür ta bilemer, anungji aji aridoktsü atema süngyanglu külemer putir dangi oa külemküja mapa inyadaksür saka temang tamajung kümer külenang tesüsa mozü ki bushidangbo kangasa menuadoker asür. Iba ama asenok mashimalu agi mojing arütsüba aser mojing külemba mapatem ataloker. Itemji mojing mapa masü asenok mashimalurtem mapaa ta asenoki metetdi. Aji oda, asenoki amataraba aser asenoksasa asenok mazüoktetba mapatem ajak asensasa asen dang atongtsü melen, item ajakji mojing dang tongra, atangji, mojingji asenok asütsü. Iba ama tensa ka nung, nisungtem tereprangtsü nungbo tangatet amai saka mapa nungbo mangatet kümer peisasa pei akoksatsüsa timtem tebilemtsü bener jajadang, kinunger adianutemi aser talisa asenok taküm Tsüngrem dak amangertemi sarasadem nung aser shisatsü nung yariteptsü kanga nüngdaker. Atangji, akhidangbo tamangertem ajak asoshi arok tenla kiji ajak atema saraasadem ki liasü, anungji temulunger aser nüngdakba purtembo anepdanga, anüngdanga aser aonunga tenla ki bushia oa sarasadem. Ajisüaka, tanübo tenla ki dak alaka tejangrartemi lapokba sarasadem ki aika tesem balala nung lapoka angur. Ajia junger, kechiyong alima tebilemtsü, tejangraba aser taginütsü ajak nungi pilar mapang mapang shia kidang nungi pilar Tsüngrem den telongjem mapa tajung aginertem asoshi item azüngmeyakdak sarasadem kiji tanela nung tashi tasen angudak aser atangji shi nunga taneptsü angudak asütsü. Ajisüaka, sarasadem kidang alirtem jagi parnok dangi sarasadem aginüa arurtem timtem, taginüba aser nüngdak shitak meteta anepalutettsü asoshi Tsüngrem nungi tesayuba aser tetuyuba ngutettsüla. Ajisüaka, taneptsü aginüa azüra aita mesüra tezüng temesen ka raksar yiara aita sarasadem ki bushia arunung, yangji sarasadem nokinketertermi mojingang arütsür, shirangerjibo lumidaksüra, ashiko, ajibo Tsüngremer tetuyubabo masütsüa akok. Aji oda, asenok shirangertemi dang masü saka sarasademtsürtemia mojing dang marütsüi sarasadem tamang agi dang ajungtsü asü mesüra mozü achi nung ajungtsü ta amangba tamangba agi ajungtsüar, Tsüngremeri asenok nem agütsüba tangatetba ain agi angatettsü merangtsüla.

# OLEMSABANG

## Rev. Dr. Clark-i Tenzükba Arogo Otsü

Rev. R. Temsü Imchen

(Yashi adok nungi...)

1885 küm tetenzüklen Molungyimsen yimsüsürtem kar anir Longkhum yimtiba nungi tenzükker Aoyim aika semdanga Tsüngrem yimsü osangtajung agizüka, asenok rongnung yimjung aser putepa alitsü\_sayua senzü. Iba akangjungshitep mapa Clark-i inyakba ajanga Aolima nung kati ka kolak bushitepba anendakja Ao kin nung yimjung yanglu. Ano 1888 küm Tzüla adener alir yim ishikati Aoyim ka amak. Anungji Clark-i British sorkar Wokha S.D.O. dangi shiti ka zülua bener Molungyimsen yimsüsür kar yok nung Wokha S.D.O. jagi Sibsagar Deputy Commissioner dangi ang teyari meshia shiti zülur agütsü. Anungji Molungyimsen yimsüsürtemi yaria Clark-i Sibsagar D.C. aser Wokha nungi sepaitem arua Aoyim amaker yimtsüngtem nem temerenshi agütsüja sensü. Iba sülenbo Tzüla ayong ajanger alirtemi Ao yim mamak. Ano Clarki Aoyim ishika nem yimtsüng anüktsü atema prangbong agütsüba ajanga tsükchirtem nungi item yimtemji kümzüka liasü. 1892 küm Lanurtem asoshi Clark, S. A. Perrine, aser Haggard par aseme Lanurtem asentenshi sendong ka tenzük. Tangbo ibaji Youth Ministry ajanga takok ngua inyaka aoba asenoki angur. Anungji asen nübür tazü tia nung alidang parnoki asenok atema inyakbaji atemata dangbo masü ta asenokia shiteter.

4. Rev. Dr. Clark mapang nungi Ao Mungdang Sentepba Arogotem: 1897-1919 (küm 23) tsüngda Ao Mungdang Sentepba arogoji itemi liasü ta Nokinketer Mungchen page 94 nungi:

1. 1897 Molungyimsen Baptist arogo Anogo: March 12-14
2. 1898 Impur Mission Centre November 5-8
3. 1899 Yajang. 4. 1990 Merangkong. 5. 1901 Wamuken 6. 1902 Lirumen. 7. 1903 Waromung. 8. 1904 Impur. 9. 1905 Longpa. 10. 1906 Asangma. 11. 1907 Impur. 12. 1908 Waromung. 13. 1909 Changki. 14. 1910 Molungyimsen. 15. 1911 Okotsu (Lotha Area). 16. 1912 Longjang. 17. 1913 Impur. 18. 1914 Aonokpu. 19. 1915 Chungliyimsen. 20. 1916 Longpa. 21. 1917 Mangmetong. 22. 1918. Chungtia. 23. 1919 Changki. 1897-1919 küm 23 tsüngda nungji Impur nung 3 ben, Molungyimsen nung nung 2 ben, Longpa nung 2 ben, aser Changki nung 2 ben aser Waromung nung anaben ta Ao Mungdangji kayonga aruogo. Küm 23 tsüngda Ao Naga Baptist Arogo Mungdang agizükba arogotemji ANBAM khuret tongzükbaaji atemata dangbo masü ta tanü putui tenüngsang agütsür.

### Oktem:

Iba ocet azünger dang shinübaji Dr. Clark-i tenzükba arogo küm 150 Benjongmung nung ABAM Executive Secretary Tsüngrem O jembitsü jaok nung, pa meyoktsü lemtetbajibosa kanga tamashi telemtetba agiogo ta shiteter. Ano ABAMi Yimjung Committee ka nisung 15 agi akümba shimba nungji ABAM Sanen Luden nungi parnok 9 aser nisung 6 public nungi shim, saka iba yimjung committee yagia mapa kecha meinyaktet. Kechiaser ABAM Sanen Luden züngsem par 9i bilemba dang agidi ta asüba agi Ao Mungdang otsü nung mezüngbuba iba "Yimjung Committee" yagi tamakok angu. Anungji 2023 Tir Yimyim adok ka nung Rev. C. Walu Walling aser Rev. Dr. Wati Longchar tenadi "Molungyimsen arogoi ABAM den iba keno jembinüa mepishi, saka ABAMi mapang magütsü nungji Couti aotsübaji dang ato" ta ashibaji shitak ataloka Molungyimsen Senso Mungdang, Molungyimsen Village Council, aser Molungyimsen Baptist Arogoi ABAM anema Court nung Case agütsü.

Telok aseme ABAM anema Court Case agütsü nung ABAM otsü nung ano Committee tasen ka "Settlement Committee" koba nung Aor Senior Advocate 4 aser Senior Pastor 5 ta shimteter Outside of the Court nung case tembangtsü ABAMi shimteta yutsü. ABAMsa tia maka iba Settlement Committee yagibo kanga junga shisadanger yimjung maparen ka inyaktettsü südi ta sarasadema alidang, parnoki ABAM dangi abenbaji ABAM Sanen Ludeni magizük. Anungji ABAM otsü nung küm 150 tsüngda nung Lenla Inti Mungdang June 4, 2024 nung jazük. Iba anogo Settlement Committee ajanga onoki mapa makok ta ashiba sülenbo ABAM Courti maotsü dang lemteter senshi. Iba den bendenloksema ABAM tenokdakdak madenerdenbo amalitep masütsü ta lemtet. ABAMji kechi nung noktaka lir? aser ABAM nokdakdak madener denbo amalitep masütsübaji kechi ajanga ta asüngdangnür.

Rev. Dr. E. W. Clark-i legacy-jibo alima mesama tashi shitak dang alitsü. Saka putu melentepa lenisüba balala arudang tanü ABAM nokdakdak mejangjateti aliba ama ya mapang shia ataloktsü. Clark-i arogo ishika tenzük yutsüba asenok ajaki meteta kar. Saka Clark Ao Naga tenem nung Clark Pastor inyakba arogo küm 150 abensaba Benjongmung nung ABAM Executive Secretary Tsüngrem O jembitsü meyokbajibosa kanga tamashi ta angateter. Anungji item tebilemtsütem ya ABAM otsü meteta alir tantsü tambutem tang parnok taküm aliba mapang nungsa yimjung yanglua Ao kin asoshi Tsüngrem dang temoatsü meshia Naga kin ajak tamang telongjem nung anir aotsü Tsüngrem dang sarasademda shilem agidi arung! ta sangoktsür.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Argentina nung Gospel Night sentong nung nisung 80,000 aden



Buenos Aires nung Gospel Night sentong nung adenertem tangokba noksa nung angur.

**November 22, 2024:** Argentina yimtiba, Buenos Aires nung ghonda 8 tashi Gospel Night sentong nung shilem agir 2,000-i pei tamang jenjang lemsatepa liasü aser iba sentong nung linük tesem balala nungi nisung 80,000 shi aden.

Taküm agi küm anabuba Gospel Night ya ayongzüka agiogo. Iba sentong ya Ministry of Culture-i ayongzüker.

Iba sentong nung kenten, tsüngsangba, jilushi sayaba, sangro azüngba, painting aser visual arts workshops densema liasü. Iba dak alia photography, Christian publishers aser tanurtem atema-a sentong

balala agia liasü.

Iba sentong ya General Directorate of Entities and Worship, Special Projects Area of the Office of Deputy Chief of Government aser General Directorate of Family Development-i sponsor asü.

Takümbo iba sentong nung sabang 9 liasü aser Diagonal Norte Avenue nung shilem balala agitsü atema moapu liasü.

Kasa sentong nung choral ken atenba den külemi lenmang nung jilushi ai.

Iba sentong nungsa tanurtem atema shows aser circus lir, aser item ajak ya Yisu Khrista tiyongtsü südaksür agiba sentongtem

liasü.

Taküm iba sentong omenji "Arogoi lenmang nung Khrista osangtajung proker" liasü.

Taküm Gospel Night sentong ya yaküm dang nungi asemsü agi tuluba liasü, kechiyong yakümbo iba sentong nung sabang asem dang liasü aser shilem agirtem 700 dang liasü.

Buenos Aires yimti nung Council of Pastors-i item sentong nungita yariba ajanga iba sentong takok tulu angu.

"Gospel Night ya sentong ka dang masü saka Yisu tenüng ajungketsütsü atema ayongzüka sentong liasü," ta sentong ayongzükertemi metetdaksü.

## Netherlands nung national evangelical alliance ka nüngdaker

**November 22, 2024:** Netherlands nung Khristantem aikati linük nung evangelical alliance ka nüngdaker ta bilemer ta survey ka ajanga bushitet.

Parnokisa züngsem tasepurtem dang iba organization nung adentsü mepishir.

MissieNederland (Dutch evangelical alliance)-i iba survey ya taküm September ita nung agi aser nisung 309-i iba survey nung shilem agia liasü; shilem agirtem rongnung shilem 46 bo alliance nungji densema mali.

Iba survey nung shilem agir shilem 95-i, Kibubai tenyaba wadang tulutiba maneni inyaksü asoshi evangelical alliance ka nüngdaker, ta ashi.

Iba survey agiba mapang nung evangelical alliance aser evangelical lenir 40 o lemtepa liasü. Evangelical Khristantem ajak atema organization ka nüngdaker, ajisüaka Dutch Evangelical Alliance nükjidingtem nung maneni rangloker inyaksüla, ta parnoki bangjema liasü.

MissieNederland board nung chairman, Setkin Sies-i,

"Tangar den longjemer MissieNederland yangertsü onok tebilemba lir, ibaji ajanga dang Arogo nung evangelical ola angashitsü, loktiliba nung o entepetsü aser Dutch society yangertsü," ta ashi.

Parnoki longjemer Khristantem dang national alliance nungji adentsü ajungshir. Iba shidi nungji sign süa alirtem rongnung Jan Hol (Chairman of Executive Board of the Christian University of Applied Sciences Ede), Bente S. Gundersen (Salvation Army nung Commander), aser Revival Foundation nung Director Carlino Bus nung densema lir.

Iba telok jagi, "MissieNederland ya ajak longjemba organization ka lir, koba ajanga Arogotem aser organization balala nung Khristantem sendakteptsür, evangelical maitsü shisangdaksür aser ajak nung tiyongtsüji Khrista lir," ta metetdaksü.

"Ibayongji onoki Khristantem, Arogotem aser organizations dang MissieNederland nung adentsü ajungshir. Khrista nung

telongjem jungkai adokdaksütsü aser alimai Pa metettsü atema longjemtsüla," ta parnokisa metetdaksü.

1846 küm British Evangelical Alliance tentetba sülen mapang tatsüka dang lirbo Netherlands nung evangelical alliance ka tenteta liasü. Ajisüaka Bible study aser loktiliba nung inyaksangshi ajak Second World War mapang nung anena liasü.

Evangelical Missionary Alliance ya 1973 küm tentet aser iba Alliance nungji Netherlands nung aser bendanglen aliba missionary tem densema lir. Iba sülen Dutch Evangelical Alliance-i Netherlands nung dang rangloker mission mapa inyak aser 1979 küm asentenshir Alliance tenteta liasü. 2013 küm "EA-EZA" nungja kübok organization ana ya loktepa liasü.

MissieNederland organization ya tangbo tashi meiti kümogo. 2023 küm tatemanglen tashi nung World Evangelical Alliance nung iba organization densema national evangelical alliances ajak senteper 143 lir.

## ANOGO ABEN TSÜNGREM DEN

### Halleluyah

### Nenoki kibuba sangang (T.Ken 146:1)

Halleluya Oji "Nenok Kibuba sangang" ta meyip. Iba O ya Tenüngsang Ken nung metsür pezüben amshiba angutsü aser Jungkai Adokba tapu ter tuku nung pezüben angutsü, meyokteper metsür tiben amshiba angutsü. Tenüngsang Ken nungji alima Halleluyah aser Jungkai Adokba nung amshibaji kotak Halleluyah lir. Ibai tanga o ajanga tanga oshi nung meyipzüksü makok. Ibai Greek, Latin, German, French, Italian, Dutch aser English ajak nung kasa amshir. Kin ajaki kotaker ken nung Halleluyah amshir.

Yimya Halleluyah : Tenüngsang Ken 104ji iba o yagi atenba angutsü. Iba ken yimya tebur ajungba sangro ka lir. Ibai temoatsüba Tsüngrem dangi tanela ajaba agi tenzüker aser Tsüngrem uluba, Pa tamaren indang yimya bushiba nung yimsü mulungjang atenba shisatsü nung jembir. Tesangwaji Tsüngrem sobutsü. Pai süki ama anüngtem atsülanga toktsür aser tzüym kimongji Pai yanglu. Mepettemi Pa talungtsü aser mopung tashikang nung amener. Tsüngmokji pa ola. Pai ayongnutemji yanglu koba agi ozü aser arem shiruru nem tzü agütsür. Remji nashi telok asoshi, süngdongtemji ozütem tesepe yanglutsü asoshi, tenemtemji arem naponngtem asoshi, lungtemji shisen jenokdak asoshi Pai yanglu. Item yagi Pa temeim aser shisatsü indang sayur. Pai ita aser anü asoshi ozüng yanglu. Anü adoker aser anü tesangwa nisungtem pei mapai aor aser nikongtsütsü tashi mapa inyaker. Ammangi anisüngzüker agütsür.

Idangji ken züluri tzüym dangi meyip kong oset jenti lir aser tzüma nung rongtem senzür aser telung nung shiruru tulu asayar. Tsüngremi itemji taküm lidaktsür . Yimya bushiba jagi ken zülur mulung Tsüngrem tenüng asangba agi sünga kümdaktsü. Pai ashi, "Pa asoshi kü teshisadangba tanang asütsü. Ni Kibuba nung pelatsü." Kaket anaji memesüktepi mali. Tsüngremi aji asenok asoshi zülü, yimya kaket aser Jungkai Adokba kaket. Anaprongla nung Tsüngremi Pa sasa jungkai adok.

Yimyaren alir shirnoki Tsüngrem mapa nung Pa mangur parnoki parnok sasa tenük poker alir aser angutsü nungtemer. Tsüngrem dak mamangertem parnok sasa nükpok shimertem lir. Alima nung, tzüym nung aser anüng nung kechisarena agi Tsüngrem jungkai adoktsür.

## United States nung Tenla kitem amakba anasü agi teimba kümogo

**November 22, 2024:** Yaküm California (33) nung liasü aser tanabubaji Texas (tatalokba 28) nung Tenla kitem rongdoktsüba, raksatsüba mesüra Tenla kitem anema inyakba tatalokba 436 liasü, aser ibaji 2022 küm Tenla kitem anema inyakba dang nungi anasü agi teimba lir, ta Family Research Council (FRC)-i metetdaksü.

Yaküm US nung Tenla kitem anema inyakba tatalokba 436 ji 2018 küm den medemdangra tiben agi teimba lir, ta report nung shia lir.

Tenla ki rongdoktsüba mesüra raksatsüba tatalokbatem dak alia Tenla kidang prangpong amshiba aser bomb agi amokmerenba tatalokbatem-a densema lir.

Yaküm US kübok state 48 nung aser District of Columbia nung Tenla kitem anema inyakba tatalokbatem liasü; Hawaii aser Wyoming state na nung ang item ama tatalokba maliasü. Tenla kitem anema inyakba tatalokba teimtibaji

California (33) nung liasü aser tanabubaji Texas (tatalokba 28) liasü.

FCR report ajanga ashiba agi, yaküm US nung Tenla ki bensatsüba tatalokba 315 liasü, rongdoktsüba mesüra rongdoktsütsü merangba tatalokba 75 liasü, Tenla kidang prangpong amshiba tatalokba 10, bomb amshia amokmerenba 20 aser tanga tatalokba 37 liasü; item tatalokbaji yaküm January nungi November ita tashi nung atalokba liasü.

Yaküm June ita nung Annapolis, Maryland nung aliba Fowler United Methodist Arogo Tenla ki raksatsüba ajanga dollar sen 100,000 takoksa angu. Ozüng alema inyakerem jagi Tenla kidang menden raksatsüba den külemi osangtajung ken kakettem aser Laishiba aika raksatsü. Parnokisa Kangki laodaktsü, Khristan wako raksatsü aser Tenla ki kikümbang raksaja liasü.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Tashi**

(adv) mersü agi temeli arongba ( chilli hot)

\* Naga nungeri mersü tashi aon chinür.

**Tashi**

(adv) angoba, ayangba (pain)

\* Ni tashi agi yirur tashi marem ayimten.

**OLONG PAITEP # 6990**

1			2						
								3	
		4							5
						6			7
			8					9	
				10					
11		12							
						13			
		14							
			15						

**TIPIEN :**

- 1. \_\_\_\_\_ otsu - 8
- 3. Chi atemba tou - 2
- 4. Mapang matong - 3
- 7. Mebilemtet - 3
- 8. Tilar masü - 5
- 10. Odang inyak - 5
- 11. Teni nungi aluba - 3
- 13. Kumbok mulung - 3
- 14. \_\_ \_ en - 2
- 15. Mapang tajungdang - 8

**LANGTSÜNGLEN :**

- 1. Sayatenya sayu - 9
- 2. Nokdang - 7
- 3. Kaloktsü - 3
- 5. Shisatsü tongmelang - 9
- 6. O taret - 5
- 9. Azüing meyak - 7
- 12. Tsüksü septokba oset- 3

**OLONG PAITEP # 6989 TELANGZÜBA**

**TIPIEN :**

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

**NAI-A YA METETTER MA**



Arishi küm 59 tain DonnaJean Wilde-i ghonda ka nung 1,575 push-ups sütetba ajanga world record yangluogo. Canada tsür DonnaJean-i push-ups asüba ya Guinness World Records-i agizükogo. Taoba nung DonnaJean-i abdominal plank position (female) otsü ka yangluteta liasü. Lai iba mapang ghonda 4, minutes 30 aser second 11 tashi abdominal plank position otsü yanglutet. La indang tesüsabuba record yanglutsüba mapang lar semchir 12 nungi 11 la den liasü.

**Dubai-i Khasi Mandarin naring metric tonne ka yokogo**



**Guwahati, November 22, 2024 (Agencies):** Meghalaya-i tawa tu Khasi Mandarin naring metric tonne 1 tashi Dubai-i yokogo.

Khasi Mandarin naring ya

naring bener yok.

Meghalaya nung aluyimterm global markets den sendaktepba nung iba ya mera tulu ka lir.

Meghalaya-i Lulu Group International, Mother Dairy Fruits and Vegetables Private Limited, aser National Cooperative for Organic Limited den yaritepa global markets den sendakteper.

2022 küm Khasi Mandarin naring metric tonnes 5 tashi Middle East-i bener yoka liasü.

Meghalaya sorkarisa New Delhi aser Bengaluru nung pineapple aser Khasi Mandarin festivals amala ayonga mongogo.

**Justice D Krishnakumar-i Manipur Chief Justice inyaktsü**

**Imphal, November 22, 2024 (Agencies):** Manipur High Court nung Chief Justice inyaktsü atema Justice D. Krishnakumar-i tezüngzüktep agiogo.

Manipur Governor Lakshman Prasad Acharya-i Raj Bhavan nung Darbar Hall nung tezüngzüktep agidaktsü.

Justice Krishnakumar-i taoba mapang Madras High Court nung inyaka liasü aser

November 20, 2024 nü India President-i Chief Justice inyaktsü shim.

Pai Justice Siddharth Mridul melenzüktsü. Justice Mridul ya kumsük agi tonger mapa nungi sodi agiogo.

Iba sentong nung Chief Minister N. Biren Singh, Manipur Legislative Assembly Speaker Th. Satyabrata Singh, Cabinet Ministers, Rajya Sabha MP Sanajaoba Leishemba,

MLAs, judges aser ketdangsürtem aden.

"Senso shia indang temeten kümzüka ayutsü aser akhümtsübuttsü nü den külemi inyaksemtsü yongyar" ta Chief Minister N. Biren Singh-i Justice Krishnakumar dang metetdaktsü.

"Nü kumsük nung shisatsü, terenlok aser Manipur nung tajungbalen melenshiba mapang ka südakjangma" ta paisa ashi.

**Guwahati nung Bangladeshi nunger ana apu**

**Guwahati, November 22, 2024 (Agencies):** Bangladesh nunger anati ozüing alema aruba atema Guwahati nung police-i puogo.

Bangladeshi nunger ana ya Jammu and Kashmir-i aotsüba liasü aser osang tejangja ka angazükba sülen tena apu.

Tena ya Arman Malik aser Samsita Begum na ta jangjaogo aser tena Tripura arrtsülen

ajanga India-i aru. Tena ket nung kulikaket tejangja maliasü aser tout ka ajanga ozüing alema India-i aru. Iba dak sendakba nung police-i bushisüngdang südar.

Hokolbarnü Khowai, Tripura kübok Teliamura Railway Station nung Bangladeshi nunger 12 apu.

Osang tejangja kar angazükba sülen Government

Railway Police (GRP) aser Border Security Force (BSF)-i Bangladeshi nungerte apu.

"Onoki parnok dang asüngdangya asüandang Tripura nung Gomati district kübok Silachari area ajanga parnok India telungi aitba nangzük. Bangladeshi tout kati parnok international border ajangtsü teyari agütsü" ta ketdangsür kati ashi.

**Manipur kübok Bishnupur nung 3.6 magnitude menoknok anak**

**Guwahati, November 22, 2024 (Agencies):** Hokolbarnep Manipur nung 3.6 magnitude asadangtetba menoknok ka anak.

Tanep 4.42 ako meta Bishnupur district nung tiyongtsü ser ali telunglen kilometer 10 irr

menoknok anak.

Ajisüaka menoknok nung nisung asüba mesüra kiojen raksaba osang kecha mali.

Taküm October 4, 2024 nü Manipur nungsa kasa tashi nung menoknok ka anak.

Ukhrul district nung tiyongtsü ser anepdang 7.02 meta menoknok anak.

Manipur densema Northeastern state tem ya 'high seismic zone' nung lir aser mapang shia menoknok anoker.



Assam nung Mahapurusha Srimanta Sankaradeva Univesity (MSSU) nung tawa Lightning Detector ka enokba angur. Iba ya Ministry of Space kübok North Eastern Space Applications Centre (NESAC) ajanga agüsü aser temeket nung tsüingi aiba metettsü. Iba mapa ya Vice-Chancellor Mridul Hazarika, Registrar Sarat Hazarika, Joint Registrar Nayan Moni Saikia, aser Deputy Registrar Bichitra Bikash nung lenisüba kübok inyaka liasü.



### Alimai Russia nem telangzüba agütsütsüla: Zelensky



khaloktsü, ta Brehostibarnü ashi aser ano tali khaloktsütsü ta tekumdangtsü shia liasü. Tarutsü nung ama amala nok-nü amshia amaktsü mapang civilian nem metetdaksütsü ta pai ashi.

Kasa anogo Zelensky-ibo Russian sepaitemi Dnipro yimti nung intercontinental ballistic missile khaloktsü ta shia liasü, koba Putin-i ashiba den mapeter.

**Kyiv, Yimpoksüi/Nov. 22 (Agencies):** Russia-i ballistic missile tasen amshia Ukrainian military facility ka amakba ya rara tamajungba kumdaksüba tejangja lir, ta Ukraine Tir Volodymyr Zelensky-i ashi aser alima ajunga dang aitsütsü ayongzük.

US aser UK ajanga yangluba missile tem amshia Ukraine-i tan hopta Russia nung litsu telung nung military targets nung amakba sülen Moscow-i amaker, aser anogo 1,000 junga rara aruba tali tamajungba kumdaksür.

US aser UK-i Kyiv dang parnoki yangluba nok-nü amshia Russia nung litsu nung amaktsü melaba langzüba Russia-i Brehostibarnü Ukraine indang Dnipro yimti nung hypersonic intermediate-range ballistic missile ka khaloktsü.

Tir Joe Biden indang administration nungi temelaba agütsüba sülen Ukraine-i November 19 nü US-i yangluba ATACMS trok aser November 21 nü British 'Storm Shadow' missiles aser US-made HIMARS khaloktsü ta Putin-i ashi.

"Ibai rara tamajungba kumdaksüba tejangja lir. Tanü Ukraine anema ballistic missile amshiba yagi Russia-i yimjung alitsü tejangraba mali ta kuli tali sayur," ta Zelensky-i social media X nung Dnipro yimti amakba indang ashi.

"Iba mapang nungi tenzuka, taoba mapang West-i tenzükdaksüba Ukraine nung rara ya 'global character' ka kumdaksür," ta Putin-i linük den jembidang ashi.

Russia-i ballistic missile tasen ka amshia amakba ya rara tamajungba kumdaksüba nung mera tanabuba lir, kechiaser mera mezügbuba ya rara nung North Korea dendakja sepai 11,000 shi aniokba ya lir, ta Ukraine tiri ashi.

Long-range aser middle-range missiles khaloktsütepa Russia aser Ukraine tsüngta rara tesashiba akumba mapang China-i linük anaprong dang atsüanem akatsü ajungshia liasü.

Brehostibarnü Russia Tir Vladimir Putin-i "Oreshnik" (the hazel) ta ajaba medium-range, hypersonic ballistic missile ka Ukrainian military facility ka nung Moscow-i

"Ukraine mepetmesü atema tensa tamajungba mekumdaksüi yimtenren tsütsü pangzüng ka yanglutsü China-i ajungshia nokdakba masetshie lir. Iba atema China-i tajunglen kati arutsü asoshi maneni shilem agitsü," ta China ketdangsur kati ashi.

### Pakistan nung tamangbayimsü dak sendakba nung nisung 42 tepset

**Peshwar, Yimpoksüi/Nov. 22 (Agencies):** Pakistan northwest tsütsü Shia pilgrims tem indang convoy ka nung telungpuri injang khaloktsüba nung nisung 42 asü, ta Khyber Pakhtunkhwa province ketdangsur temi ashi.

indang deputy commissioner Javedullah Mehsud-i ashi.

nüburtem mena aliba convoy amak, aser ibai tazü mapa lir," ta ashi.

Brehostibarnü Kurram tribal district nung iba lendong atalok, kong asürtem rongnung tetsür aser tanurtem dena lir, ta police temi Hokulbarnü ashi.

Tasü mang ajak ngutetogo aser nikongdang aremtsü, ta Mehsud-i osangbener dang Hokulbarnü ashi.

Kasa province nung lendong ka ataloka sepai 20 tepseter anogo ishika lir ano iba lendong ya ajurur. October ita Kurram nung kin balala tsüngta raratepdang nisung 11 asü.

Ali agi raktepba mechi Shia aser Sunni kin tem tsüngta Afghanistan den arütsüa aliba Kurram region nung July ita nungi tamangba yimsü dak ajemdaker azüdokshiba tali kumogo.

Iba lendong nung nisung 20 yiru ta police temi ashir.

Kurram nungya mapang talangka nungi Shia aser Sunni teloktem tsüngta rara aruba lir. 2007 aser 2011 tsüngta azüdokshi nung nisung 2,000 dak tema takum samaogo.

Kurram nung Shia pilgrims tem convoy ana nung police temi meiner aodang prangbong bena alirtemi injang khaloktsü. Tang tashi iba lendong agütsüba atema telok katia tenüng agia mali.

"Onoki yasüng tetsür aser tanur densema Shia nung nisung 26 kumzükogo, shirnok Sunni telok temi pua yua liasü," ta Mehsud-i ashi.

Tenem agi sünga aliba region ya Afghanistan indang Khost, Paktia, aser Nangarhar provinces tem den arütsüa lir, kong Pakistan Taliban mesüra Tehreek-e-Taliban (TTP), aser ISIL (ISIS) temi mapang shia amaker.

Convoy ya district headquarters Paranchinar nungi Peshawar-i aoba mapang lendong ya atalok, ta Kurram

Ajungbena injang khaloktsü tenzük aser ni sarasadema ibai ni asoshi tatembang asütsü ta bilema liasü, ta iba lendong nungi takum kumzüksang arishi küm 28 tain Ajmeer Hussain-i osangbener dang ashi.

Ita tetenzüklen Parachinar nung nisung meyirijang aika adenshia yimjung asoshi jaja aser sorkar dang Kurram nung alir nisung 800,000 atema security tajungba agüjang ta khanga liasü, shirnok shilem 45 dak tema Shia minority lir.

"Kü jakdang mena aliba passenger ana tetsüngzüng nung ni mejang. Tenaprong dak injang agi khashia idangjisa asü," ta pai ashi.

### Trump-i attorney general atema Matt Gaetz melen Pam Bondi shim

**Washington, Yimpoksüi/Nov. 22 (Agencies):** US conservative nübu tejangja Matt Gaetz-i tim masüba mapa inyaka shi nung medem ta tai tonglokja aliba ken nung tali asendenshiba sülen pa United States attorney general inyaktsü atema bilema aliba nungi anener ta sangdong.



Pam Bondi

Gaetz-i iba osang sangdongba den külemi Brehostibarnü Trump-i taoba Florida attorney general Pam Bondi tenüng sangdonga liasü.

indang legal arm ketdangsur lir aser Trump indang tembar tajung ta ajaki meteta lir aser tang US tir inyaktsü shimteta alisang anema mezüng ken o benoka jembidang la ya legal team nung liasü.

samatsüsa akumer. Gaetz-i iba tai tonglokja aliba ya magizüker.

Bondi ya America First Policy Institute think tank

Trump-i hopta ka tejakdang shimsang Gaetz-i social media sangdong ka nung pa ya dangar tetsüng metsüdak kumogo ta ashi. Gaetz ya Trump'er Republican Party nunga telemsa adokdaksür nisung ka lir aser US Senate nung pa indang nomination anema nokdaker alitsü amai ajiteter.

Trump, shibai political opponents anema sorkar indang tashi amshitsü tebilemba aliba sayua lir, pai social media post ka nung Gaetz mapa asoshi pelaba lemsatpep.

"Menüngdakba nung mapang talangka atsülanga asatepba nung indoktsü mapang mali, anungji Attorney General ama tenzüktsü asadanga nungi kü tenüng agentsü. Trump indang DOJ (Department of Justice) ya mezüng anogo nungi renemer alitsüla," ta Gaetz-i social media X nung ashi.

"Pai kanga junga inyaka aru, saka kasa mapang Administration atema tetsüng metsüdaker mesüdaksünü, aser iba atema akhum agütsür," ta Trump-i pa indang social media site Truth Social nung ashi.

"Donald J Trump ya puti otsü nung takok tulutiba nguteta inyaker tir ka akumtsü asoshi ni maneni bendanga agütsür inyaktsü."

Taoba mapanga DOJ ajanga 'sex trafficking' atema taoba küm Gaetz bushisüngdanga liasü saka ken o mebenoki tembang.

Tematiba jenjang nung aliba Republican lenirtem den raratepba den ano arishi küm 17 tain tetsür ka den shi nung medem (Florida law agi memelar) ta tai tongloktsüba ajanga Gaetz maongka

'Sexual misconduct' ken o nunga US House Ethics Committee ajanga pa bushisüngdang asü aser tetsür ana indang lawyer kati bushisüngdanga committee dang Gaetz-i 2017 nungi tenzuka shi nung medemtsü asoshi ishoben sen agütsü ta shia liasü.

Trump-i pa attorney general inyaktsü shimba sülen committee yagi Gaetz indang report sayatsü asü masü ta o intepa liasü.

Trump-i attorney general atema pa shimer ta sangdongba sülen taoba hopta Gaetz ya US House of Representatives nungi anena liasü.

**Pradhan Mantri Bhartiya Janaushadhi Pariyojana**

kübok nü meyong

**Jan Aushadhi Kendra lapokang**

Jan Aushadhi Kendra kiburtem ita shia tajangzük sen 20,000/- tashi angutsü.

Jan Aushadhi Kendra komaser lapokjar metettsü atema QR Code Scan süang

Self Employment atema maongka tajung

Online applications atema - website [www.janaushadhi.gov.in](http://www.janaushadhi.gov.in) nung angutsü mesüra toll free helpline **18001808080** nung call süang.



## Elite Cricket Club-i 2nd Kohima Inter-Club T20 Tournament akok



**Dimapur, Yimpoksüi/Nov. 22 (TYO):** Kohima District Cricket Association ajanga Chümoukedima district kübok Sovima Cricket Ground aser Nagaland Cricket Stadium, Sovima nung ayongzükba 2nd Kohima Inter-Club T20 Tournament takok marok Elite Cricket Club ajanga ngutetogo.

Final match nung Elite CC yagi Kohima Hornbills madak runs 49 agi akok.

Toss akokba sülen Elite CC yagi mezüing batting shimteta overs 20 nung 147/4 yangluteta liasü. Elite CC nungi Imomenba-i ball 37 nung runs

41 yanglutet, Zidu-i ball 25 nung runs 33 aser Viketho-i ball 27 nung runs 29 yangluteta liasü.

Kohima Hornbills nungi Anga Vizale-i over pezü nung runs 31 agütsür nisung ka out sütsü aser Vithoshe Yeptho-ia over pezü nung runs 28 agütsür nisung ka out süja runs ajema agütsütsü kanga meranga asayaa liasü.

Kohima Hornbills ya overs 18.2 nung runs 98 yangluteter asayar ajunga out süadok.

Vithoshe-i runs 27 (not-out) aser Kepesielie-i runs 18 yanglutetaka Hornbills nungi asayar temi partnership

yanglua target metongteti liasü.

Elite CC nungi Sepichem-i over pezü nung wicket asem agi aser Kelhousielie-i overs pezü nung wicket ana agia liasü.

Iba asaya nung Player of the Final sempet ya Elite CC nungi Sepichem nem agütsü, Best Bowler sempeta paisa angu, Best Wicket Keeper sempet Kohima Hornbills nungi Neingu Neikha-i angu, Best Batsman sempet Elite CC nungi Imomenba-i angu aser Player of the Series sempet Elite CC nungi Kelhousielie-i ngua liasü.

## UEFA Nations League quarterfinal aser semifinal draw sangdongogo

**Yimpoksüi/Nov. 22, 2024 (Agencies):** Kangadang yongya aliba UEFA Nations League atema quarterfinal aser semifinal draw Hokulbarnü sangdongogo aser iba asayamung tatemlen ang ano asaya tajungtem lir.

Mezüingbuba nung Netherlands ya EURO 2024 Champions Spain den asayatsü aser Germany ya iba asayamung ayonger Italy den asayatsü.

Cristiano Ronaldo-i aniba

Portugal ya Denmark den asayatsü aser Croatia ya 2018 FIFA World Cup Final tanaben asayar ama quarterfinal nung France den asayatsü.

Asayatem mezüing leg ya taruba küm March 20 nung tenzütsü aser tanabuba leg ya March 23 nü tenzütsü. Semifinals ya June 4-5 nung asayatsü aser third-place playoff aser final ya June 8 nü asayatsü.

UEFA Nations League quarterfinals aser semifinals yamai alitsü:

### Quarterfinals

#### First leg – March 20

Netherlands vs. Spain  
Croatia vs. France  
Denmark vs. Portugal  
Italy vs. Germany

#### Second leg – March 23

Spain vs. Netherlands  
France vs. Croatia  
Portugal vs. Denmark  
Germany vs. Italy

#### Semifinals June 4-5

Italy or Germany vs.  
Denmark or Portugal  
Netherlands or Spain vs.  
Croatia or France

## China Masters: Satwik o Chirag na semi-finals tongogo



**Shenzhen, Yimpoksüi/Nov. 22 (Agencies):** India nunger tebur tarep badminton asayar Satwiksairaj Rankireddy aser Chirag Shetty nati Hokulbarnü kanga junga asayateta Denmark nungi Kim Astrup aser Anders Skaarup Rasmussen na madak takok ngua China Masters Super 750 badminton tournament semi-finals tongogo.

Paris Olympics sülen tang mezüingbuba asayamung nung asayadang taoba asayamung

final tongtetsang Satwik aser Chirag nati 21-16, 21-19 agi World No 2 tarep madak minute 47 nung takok ngua liasü.

Asian Games nung gold medal angusang India nunger ana ya semi-finals nung seed ti buba nung alir Japan nunger Takuro Hoki aser Yugo Kobayashi mesüra Korea nunger Jin Yong aser Seo Seung Jae den asayatsü.

Asaya tenzükdang India nunger ana ya kanga junga tenzükteta 11-8 nung break ali

aser ano 16-10 tashi atu.

Satwik aser Chirag na temaba sür game points trok agia liasü. Rasmussen-i smash tesashi ka yokba aser Chirag-i net nung aibelenba ajanga mezüing set akoktsü tera menu, saka paisa point nguteta akok.

Tanabuba set nung Denmark nungeri kanga meranga asayaa mapang kabo 7-5 agi parnok temaba liasü. Iba sülen Satwik-i service nung aibelena 8-8 akum, saka India nunger 11-10 agi temaba akum.

Iba sülen kanga meranga asayatapa Satwik-Chirag ya 16-15 agi timba akum aser 17-16 akum.

Ajisüaka Astrup-i net nung smash maloktsüba ajanga India nunger 19-18 agi timba akum. Iba sülen Chirag-i point ka aser Satwik-i point ka nguteta asaya tembang.

## Davis Cup: Sinner lenisüba nung Italy semis tongogo

**Malaga, Yimpoksüi/Nov. 22 (Agencies):** World number one Jannik Sinner-i kija aser tarep asaya nung takok anguba yong Davis Cup holders Italy-i Brestostibarnü Argentina madak 2-1 agi takok ngua semi-finals tongogo.

Italy ya Australia den asayatsü, shirnoki otsü yanglua iba asayamung 32 ben koka aliba United States madak 2-1 agi takok angu.

Sinner yagi tang season nung Grand Slams ana nguteta lir aser taoba hopta set kata nunga tamakok majurui ATP Finals nunga takok nguteta liasü aser pai Sebastian Baez madak 6-2, 6-1 agi akok aser Francisco Cerundolo-i Lorenzo Musetti madak 6-4, 6-1 agi takok ngua liasü.

Tarep asaya nung Sinner aser Matteo Berrettini nati Andres Molteni aser Maximo Gonzalez na madak 6-4, 7-5 agi takok ngua liasü.

“Tarep asayatsü atema parnoki ni court nung yutsü aser ni akok tashi tajungtiba nung asaya. Tanü Matteo-i kanga junga asayatetogo aser kü khu aben,” ta Sinner-i ashi.

Italy ya kümsem buba semi-finals atonger aser kümna buba Davis Cup akoktsü amai imlar.

Steroid clostebol amshiba indang March ita anaben putetba asoshi World Anti-Doping Agency dang arishi küm 23 tain Sinner-i mepishiba nungi ano telangzüba kecha arua mali.

Küm 47 atar taoba küm Italy-i Davis Cup akokba mapang kija aser tarep semi-finals nung Sinner-i Novak Djokovic madak takok ngua liasü.

“ATP Finals sülen iba court yimya metettsü mapang meliasü, anungji tanü tensa



ketdangsuba atema ni kanga pelar. Tarep asayar tajung liasü. Pai kanga junga asaya aser ni pa (Berrettini) den sako asayatsü merang, aser pai temulung uludaktsü,” ta Sinner-i osangbener dang ashi.

Davis Cup puti otsü nung Australia aser USA na timtiba asaya lir aser tan ya 48 ben buba asayar liasü. Tena tzungta mezüing 1905 nung asaya.

Mezüing asaya nung Australia nunger Thanasi Kokkinakis-i Ben Shelton madak 6-1, 4-6, 7-6 (16/14) agi tie-break nung takok angu.

US nungi Taylor Fritz-i Alex de Minaur madak 6-3, 6-4 agi takok angu aser iba sülen Matthew Ebden aser Jordan Thompson nati Shelton aser Tommy Paul na madak 6-4, 6-4 agi takok ngua liasü.

USA sülenbo iba asayamung timtiba akokbaji Australia (28) ya lir aser parnoki tesüsa iba asayamung akokba ya 2003 küm liasü aser taoba asayamung ana nung runners-up liasü.

US squad ya world number four Fritz-i anir lir aser America nunger ya 2007 sülen tang mezüingbuba iba asayamung takok marok angutsü imlar.

Taoba küm asayamung final nung Australia ya Italy-i akok aser Honibarnü iba tayang kepzüktsü terenemshiba nung lir.

## INDIA OSANG : Tapak 3 nungi...

### Tzüyim nung Navy submarine ka...

Angopurtem rong nungji nisung 13 liasü; nisung 11 kümzük aser ana maneni bushidar. Hokolbarnüa Navy-i maneni Indian Coast Guard indang rong-a amshia samaba nisung anaji bushi tenzük. Mumbai nung aliba Maritime Rescue Coordination Centre (MRCC)-ia nisung bushiba maparen nungji yaritepdar, ta Ministry of Defence (MoD)-i metetdaktüsü.

“November 21 nü Goa nungi nautical mile 70 shi pilar Indian Navy indang submarine den tsüktepbu Marthoma rong nung alir angopur ana maneni

bushidar. Nisung bushiba maparen nung Coast Guard indang rong-a amshidar,” ta sangdong nung shia lir.

Submarine aser rong naji kodaser tsüktepar bushisüngdangdar. Tang tashi nungbo Navy-i nisung samaba mesüra rong ana raksaba osangji kecha memetdaktüsü.

Taküm August ita nunga Tamil Nadu tzüyimkümnen nungi pilar tzüyim nung angopurtem rong ka aser Sri Lanka navy indang rong ka na tsüktepbu lendong nung angopur ka asü.

## BILEMDANGANG

“Shisataka o dang nungi aria bitem o tajungba.”